

REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA E -II- E RREGULLT E KUVENDIT TË KOMUNËS SË
VUSHTRRISË, MBAJTUR MË 23 shkurt 2023

Mbledhja është mbajtur në sallën e Kuvendit të Komunës së Vushtrrisë, duke filluar në orën 10:15.

Në këtë mbledhje ishin të pranishëm anëtarët e Kuvendit të Komunës së Vushtrrisë:

Adnan Lahu, Agim Bregaj, Agron Përçuku, Alban Bajrami, Ali Januzi, Arlind Gogolli, Behar Duraku, Bekim Zabërgja, Blerina Shala, Bujar Pllana, Edona Gashi, Fakete Dushi, Fatmire Cecelia, Faton Hyseni, Galip Audiu, Gresa Muli, Gentiana Rama, Ilmi Azemi, Kushtrim Hyseni, Leonora Gërguri, Lorik Maxhuni, Mek Selaci, Melihate Basholli-Latifi, Mensur Kasumi, Mensur Kastrati, Mentor Hasani, Nasuf Aliu, Nurie Halili, Nurten Çerkezi-Gjyshinca, Refik Maloku, Shkelzen Xhaferi, Spasoje Stefanoviq, Sylejman Meholli, Ymer Haradinaj dhe Zojë Hajrizi.

Mbledhjen e hapi dhe e kryesoi Melihate Basholli-Latifi, – kryesuese e kuvendit, e cila konstatoi se në sallë janë prezent 35 anëtarë të kuvendit, kuorum ky i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe e autorizuar e Kryetarit të komunës, znj.Hava Rruka-Mlinaku, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Hava Rruka- Mlinaku, drejtoreshë e DA-së-njoftoj se kryetari dhe nënkryetari i komunës gjenden në vizitë jashtë vendit, andaj ajo është e autorizuar të ushtroj kompetencat e kryetari gjatë qëndrimit të tyre jashtë vendit.

Ilmi Azemi, anëtar i kuvendit - e nderuar ushtruese e detyrës se kryetarit zonja Hava Mlinaku, të nderuar koleg deputet, qeveri komunale ju të pranishëm. Një Përshëndetje të veçantë i drejtoj drejtorit të ri të Drejtorisë së Arsimit z.Abazi dhe me këtë rast dua te uroi në këtë detyrë. Zotin Abazi e njoh kaheerë, unë dhe shumica e qytetarëve të Vushtrrisë, e njohim si qytetar modest, fqinjë i mirë, familje patriotike dhe mbi të gjitha e njoh dhe çmoj si personalitet i shquar dhe intelektual i vërtet. Drejtor ne si deputet pothuajse të gjithë po edhe qytetarët dhe stafi arsimor kemi pasur shumë brenge lidhur me organizimin e drejtorisë e cila mbeti bosh pa drejtor mbi se 2 muaj dhe emërimi Juaj në këtë pozitë na ka gëzuar shumë, bile kam menduar se ndoshta u kanë e rrugës sot në këtë seancë me ju prit me buqeta lulesh por prapë kam thanë jo tash sepse jemi të përkushtuar të ju përkrahmi në këtë mision që keni marr mbi supe unë dhe besoj të gjithë deputetet dhe lulet dhasht zoti të mos kemi zhgënjime dhe ti dhurojmë në fund të mandatit. Unë ndaj bindjen se nëse punon drejtë dhe në respektim të ligjit, nëse bashkëpunon me zyrtarët e mrekullueshëm që janë aset i çmuar i drejtorisë që drejtoni dhe nuk i nënshtrohesh diktatit e asnjë veprimi jo profesional

e jo human do të dilni faqebardhë, në të kundërtën kështu si po ju ndaj lëvdata do keni reagimin tim pa hezituat fare.

Ymer Haradinaj, anëtar i kuvendit –tha se lajmi për emërimin e z.Dardan Abazi në udhëheqjen e Drejtorisë së Arsimit atë dhe LVV-në në Vushtrri e ka befasuar tej mase sepse në bazë të informatave që posedojnë ky person nuk ka përvojë në fushën e arsimit. Andaj në këtë rast ai kërkoj informata nga drejtori i arsimit në pyetjet me sa vijon: cila është përvoja e tij në fushën e arsimit?, gjatë muajit të parë të punës a ka bërë ndonjë analizë se cila është gjendja e arsimit në Komunën e Vushtrrisë?, a keni mbajtur takime të përbashkëta me drejtorët e shkollave fillore, të mësues dhe të mesme të larta për të dëgjuar nga afër se cilat janë brengat vështirësitë dhe problemet me të cilat ata ballafaqohen çdo ditë?, a jeni takuar me përfaqësuesit e SBASHK-ut të Komunës së Vushtrrisë për të dëgjuar kërkesat e mësimit dhe punëtorëve tjerë të arsimit dhe cila do të jetë përgjigja e juaj rreth zbatimit të kontratës kolektive ku përfshihen e drejta e shujtës, pagës jubilarë, shpenzimet e udhëtimit e çështje të ngjashme?. Dhe në fund cilët hapa do ti merrni si drejtori për përmirësimin e gjendjes në arsim në komunën tonë gjatë periudhës së ardhshme tri vjeçare të mandati tuaj.

Refik Maloku, anëtar i kuvendit –tha se e di që gjendje e arsimit në Vushtrri nuk është ajo e duhura, dhe kjo është rënduar edhe me shumë me skandalet që kanë ndodhur sidomos në tri raste me konkurse ajo në lëndën e kimisë, konkursi me rekrutim në çerdhen e qytetit të cilat janë dërguar në prokurorinë e shtetit. Kjo ka ndodhur me dijeninë e kryetarit të komunës, i cili gjatë fushatës e ka pasur gojën plotë arsim, dhe i cili e bie gjendjen e arsimit në Komunën e Vushtrrisë në nivel të një OJQ-je, faktikisht emëron drejtor të arsimit një personi i cili të vetmen punë në jetën e tij ka bërë punën në një Organizatë Joqeveritare. Kjo gjendje është për keqardhje edhe për PDK-në në Vushtrri sepse kjo parti ka kudër ku punëtorët në DKA janë nga PDK, drejtorët e shkollave janë me shumicë nga PDK dhe ka edhe kuadër tjetër dhe ta biesh një drejtor nga OJQ-të, është për të ardhur keq.

Faton Hyseni, anëtar i kuvendit - fillimisht drejtorit të ri të arsimit u uroj punë të mbarë, dhe shtoi se nëse ishte marr me mendimi i tij personal ky njeri nuk do ishte emëruar drejtor i arsimit. Kjo për faktin se është rregull që për emërim në krye të një shkolle si drejtor duhet të kesh minimum tri vitet përvojë pune në arsim dhe kështu të emërosh në krye të DKA-së një person që nuk ka asnjë ditë përvojë pune në arsim nuk është në rregull. Një gjë të tillë një emërim të tillë kryetarit ia mundëson ligji sepse është post politik, por ai foli për çështje profesionale. Duke ju referuar parafolësit të tij për rekrutim në lëndën e kimisë vlerësoi se për zëvendësimin e një mësimit dhe nevojiten të paktën 60 ditë, kjo si rezultat i udhëzimeve administrative që janë nxjerr nga MASH në mënyrë të mbrapsht, dhe këtë të fundit e udhëheqë LVV-ja në nivel qendror dhe për këtë pse nuk e ngritin fjalën. Mandej shtoi se përse nuk po ngritët zëri për lëndët deficitare si kimi, fizik, matematikë dhe informatikë ku kemi shumë mungesa. Në fund ai kërkoj që komuna të ketë një strategji për simulimin e lëndëve dhe drejtimit deficitare, sepse në të kundërtën rrezikojmë të mbetemi pa kudër në drejtimet natyrore.

Adnan Lahu, anëtar i kuvendit –në fillim i uroj sukses Drejtorit të ri të DKA-së, dhe shtoi se në konkursin në lëndën e kimisë ka pasur shkelje ligjore dhe se kjo është e provuar. Fatkeqësisht shkeljet po vazhdojnë dhe ato janë bërë publike edhe në mediat publike.

Refik Maloku, anëtar i kuvendit –sqaroi se konkursi është shpallur me kohë, po ka pasur gabime sa i përket procedurës së përzgjedhjes të kandidatëve dhe për këtë është anuluar konkursi andaj kështu ka pasur edhe vonesa në rekrutim me muaj të tërë.

Bekim Zabërgja, anëtar i kuvendit-kërkoj të futet në rend të ditës pika pyetje dhe përgjigje ashtu si parashihet me rregulloren e punës të kuvendit.

Gresa Muli, anëtare e kuvendit-e përgëzoj kryetarin e komunës, për emërimin e drejtorit të DKA-së, për të cilin ndan mendimin se është një person i përgatitur dhe punëtor, andaj nuk duhet paragjykuar sepse ai nuk i takon subjektivit politikë që po qeverisë komunën. Pastaj shtoi se kritikët duhet të adresohen në formë të duhur dhe atje ku duhet tek dikasteret që kanë dështuar në kryerjen e funksioneve të tyre. Më tej ceku se ish drejtori i arsimit në mandatin e kaluar kishte dështuar në detyrën e tij, madje kur i ishte kërkuar që në shkollë të ketë sapun dhe gjëra higjienike për nxënësit ai ishte tallur me këtë kërkesë.

Zojë Hajrizi, anëtare e kuvendit- në adresimin e saj para kuvendit parashtrij disa kërkesa për infrastrukturë publike deklaroi me sa vijon: I nderuar drejtor z. Shala 1) Banoret e fshatit Strofc, Beçuk, Zhilivodë, Bivolak, Glllovin, banoret e lagjes së Nemozheve në fshatin Mihaliq, po ashtu edhe një pjesë e fshatit Druar që është afër Qyqavices, pyesin se kur do ta sillni pompën me të cilën do të furnizoni me ujë të pijes këto fshatra? 2) Në fshatin Strofc në rrugën Zymer Hajrizi, kompania e cila e ka bërë shtrirjen e kanalizimit nuk e ka përfunduar punën e tyre, gypat i kanë vendosur mirëpo gjatë vendosjes së gypave kanë lenë pengesa në rrugë, banoret po ankohen se veturat po dëmtohen kur kalojnë në atë pjesë, mbase është një rrugë e cila i lidhë dy fshatrat. Kërkoj nga drejtorja që të shkoni dhe të shikoni nga afër se si është gjendja e kësaj rruge, dhe të ndërmerri masa. Ndërsa: 3) Në fshatin Glllovin, në rrugën "Driton Islam Hasani", është bërë bllokimi i një kanalizimi banoret ankohen nga kundërmimi i ujerave të zeza që kanë dale mbi sipërfaqe, banoret thonë se kemi bërë kërkesa edhe më herët por ende nuk është bërë zgjidhja e këtij problemi, * kur do të filloni me zgjidhjen e këtij problemi drejtor? 4) Po ashtu kemi edhe një kërkesë, nga banoret e lagjes së Nemozheve në fshatin Mihaliq, banoret kërkojnë nga ju ta din se kur do të filloj shtrirja e kanalizimit në këtë lagje?

Fatmire Cecelia, anëtare e kuvendit-ngriti çështjen adresuar Drejtorisë së Shërbimeve Publike, për vend-parkingjet për personat me aftësi të kufizuar, andaj kërkoi që kjo kërkesë të realizohet për këtë kategori, ashtu që të kenë mundësi më të mirë në qasjen në shërbime komunale dhe publike. Po ashtu kërkoi nga DSHP-ja të ndërmarr veprim për sa i përket shkarkimit të mallrave në dy marketet afër komunës Viva dhe Interex të cilat gjatë asaj periudhe po shkarkojnë pengesa dhe tollovi në qarkullim. Kjo do të mund të zgjidhje duke u shkarkuar malli në një interval kohor kur ka pak qarkullim sidomos në orët e hershme të mëngjesit. Pastaj lidhur me çështjen e kremtimit të festës së Pavarësisë, paraqiti vërejtjet e saj sepse për anëtarët e kuvendit nuk ishin rezervuar vendet dhe kjo ishte një ofendim për ta. Komuna për këtë çështje paguna një person për ta mbajtur protokollin.

Ali Januzi, anëtar i kuvendit-ngriti dhe përsëriti problemin e kamotshëm për eksploatimin e një guri gëlqeror në fshatin Pasomë-lagja Dautja, ku në anë sipërfaqe më vonë është hedhur një mbeturina helmuese andaj si rezultat i kësaj është duke u kontaminuar edhe uji i pijes dhe askush nuk guxon të furnizohet me ata ujë. Kërkoj nga Drejtorja e Inspektiveve që të ndërmarrin veprimet e duhur për rregullimin e kësaj problematike. Kjo çështje ka mbetur e parregulluar me vitet të tëra dhe asnjë qeveri nuk ka punuar diçka në këtë drejtim. Në fund tha se në atë pjesë mungon infrastruktura rrugore dhe ajo kanalizimit dhe ujësjellësit.

Agron Përçuku, anëtar i kuvendit-pyeti drejtorin e Drejtorisë së Shërbimeve Publike se a janë të vërteta pretendimet e një zyrtari të kësaj drejtorie i cili publikisht nëpërmes rrjeteve sociale ka akuzuar se në qeverisjen e kaluar në DSHP është keqpërdorur një gyp me gjatësi 1600 metra fi 700 në vlerë mbi 1 milion euro, personi në fjalë ngriti shqetësimin se a është vendosur apo jo ky gyp në rrugën magjistrale që është në kompetencën e ministrisë. Lidhur me këtë kërkoi nga DSHP-ja informatë të hollësishme dhe nëse kjo është e vërtet atëherë çfarë masa janë ndërmarr.

Dardan Abazi, drejtor i DKA-së-falënderoj të gjithë anëtarët e kuvendit për lëvdatat dhe kritikën e bërë dhe ceku se shpreson se nuk do të zhgënjë në punën e tij. Ai paraqiti sqarime në temat e ngritura nga anëtarët e kuvendit.

Benjamin Shala, drejtor i DSHP-së-paraqiti sqarime duke u përgjigjur në pyetjet e anëtarëve të kuvendit.

Melihate Basholli-Latifi, Kryesuese e Kuvendit-propozoi që të futet në rend dite propozim-vendimi për formimin e komisionit për ndryshimin dhe plotësimin e rregullores të punës së kuvendit.

Ymer Haradinaj, anëtar i kuvendit –kërkoj që pika 13 e rendit të ditës Propozim – vendimi për caktim të kahjeve të lëvizjes në disa rrugë të qytetit të hiqet nga rendi i ditës duke u shtyrë për një seancë tjetër, këtë e bazon me faktin se ka pasur ankesa nga qytetarët, në këtë kontekst duhet të ketë një debat me qytetarë për të gjetur një zgjidhje të arsyeshme.

Nurie Halili, anëtare e kuvendit-propozoi të futet në rend dite një pikë e veçantë propozim-vendim për lirim nga pagesa e taksës komunale për ndërrimin e destinimit të pronës nga tokë bujqësore në tokë ndërtimore si dhe lirim nga pagesa e të gjitha taksave për pajisje me leje ndërtimore për të gjithë fermerët dhe bizneset përfituese të granteve qeveritare. Tutje propozimin e arsyetoj me faktin se ka një numër të fermerëve dhe bizneseve individuale që kanë përfituar grante dhe të njëjtit kanë hasur në problem financiarë në realizimin e projektit, por këtë vendim e kanë marrë edhe disa komuna tjera të Republikës së Kosovës.

Adnan Lahu, anëtar i kuvendit –lidhur me pikën e 13 të rendit të ditës vlerësoi se ka pasur ankesa nga qytetarët lidhur me kahjet e lëvizjes së mjeteve motorike në komunikacion, dhe për këtë çështje duhet të bëhen analizat e nevojshme duke organizuar edhe ndonjë debat publik me qytetarë para se të merret vendimi nga kuvendi.

Benjamin Shala, drejtor i DSHP-së-tha se lidhur me çështje e Propozim – vendimi për caktim të kahjeve të lëvizjes në disa rrugë të qytetit, është mbajtur një diskutim publik me akteret që i afekton kjo çështje, ku kanë qenë prezent edhe bizneset e qytet që shtrihen përgjatë këtyre rrugëve që mendohet të bëhen ndryshime. Andaj kërkoj që kjo temë të futet në rend dite për shqyrtim dhe të analizohet e në fund të merret një vendim.

Adnan Lahu, anëtar i kuvendit –pas sqarimeve të bëra nga drejtori i DSHP-së, grupi kuvendar i LDK-së është i pajtimit që Propozim – vendimi për caktim të kahjeve të lëvizjes në disa rrugë të qytetit, të shqyrtohet në rend të ditës dhe më tej të bëhen ndryshimet e nevojshme.

Ymer Haradinaj, anëtar i kuvendit –deklaroi se grupi kuvendar i LVV-së mbetet prapa propozimit që pika e 13 e rendit të ditës të shtyhet.

Në vazhdim kuvendi pas votimit me 21 vota “për” 1 votë “kundër” 1 votë “abstenim” vendosi që Propozim-vendimi për caktimin e lokacionit për ndërtimin e objektit të Kryqit të Kuq, të inkorporohet në rendin e ditës për shqyrtim.

Kuvendi pas votimit me 21 vota “për” 1 votë “abstenim” vendosi që pika pyetje dhe përgjigje nga anëtarët e kuvendit të bëhet pjesë e rendit të ditës.

Ismet Gashi, udhëheqës i zyrës ligjore-tha se kuvendi i komunës nuk ka të drejtë të heqë taksat të cilat janë të parapara me ligj, tarifatat për ndërrim të destinimit të tokës bujqësore në tokë ndërtimore është e rregulluar me udhëzimin administrativ të Ministrisë së Bujqësisë dhe Kësisoj komuna nuk e ka atë mandat ti heq këto taksa, njëkohësisht edhe për ndërtim të objekteve komuna mund ti zbres taksat por jo ti heq ato

Kuvendi pas votimit me 21 vota “për” 13 vota “kundër” nuk e aprovoj për shqyrtim në rendin e ditës propozim-vendim për lirimin nga pagesa e taksës komunale për ndërrimin e destinimit të pronës nga tokë bujqësore në tokë ndërtimore si dhe lirimin nga pagesa e të gjitha taksave për pajisje me leje ndërtimore për të gjithë fermerët dhe bizneset përfituese të granteve qeveritare.

Pas votimit kuvendi me vota “unanime” vendosi për shqyrtim në rendin e ditës Propozim-vendimin për formimin e komisionit për ndryshimin dhe plotësimin e rregullores të punës së kuvendit.

Në fund të debatit jashtë rendit të ditës dhe për rendin e ditës, Kuvendi pas votimit me vota “unanime” aprovoi këtë:

R E N D I T E

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 31 janar 2023;
2. Shqyrtimi i Informatës për gjendjen e sigurisë në Komunën e Vushtrrisë për vitin 2022;
3. Shqyrtimi dhe aprovimi i Draft – Rregullores për Përcaktimin e Kriteve të Ndarjes së Mjeteve Financiare nga Fondi për Transfere dhe Subvencione Personave Juridikë – OJQ dhe Personave Fizikë dhe Bashkëfinancim;
4. Shqyrtimi dhe aprovimi i Draft – Rregullores për Ndarjen e Bursave për Nxënës/Studentë dhe Shpërblimeve për Nxënës/Studentë të Komunës së Vushtrrisë;
5. Shqyrtimi dhe aprovimi i Draft – Rregullores për Fillimin dhe Mbarimin e Orarit të Punës së Veprimtarive Afariste – Bizneseve në Komunën e Vushtrrisë;
6. Shqyrtimi i Raportit periodik për zbatimin e rekomandimeve të dhëna në raportin e Auditimit nga Zyra Kombëtare e Auditimit
7. Shqyrtimi i Informatës për shërbimet shëndetësore për vitin 2022 në Komunën e Vushtrrisë;
8. Shqyrtimi dhe aprovimi i Raportit vjetor të Komitetit për Komunitete për vitin 2022;
9. Shqyrtimi i Informatës për punën e Këshillit Komunal për Siguri në Bashkësi për vitin 2022;
10. Shqyrtimi i Propozim – vendimit për emërim të komisionit për përzgjedhjen e drejtorëve dhe zëvendës drejtorëve në Komunën e Vushtrrisë;
11. Shqyrtimi dhe aprovimi i Propozim – vendimit për lirim nga pagesa e taksës për shfrytëzimin e hapësirave publike si dhe kiosqeve nga druri për më pak se një vit;
12. Shqyrtimi dhe aprovimi i Propozim – vendimit për ndryshim dhe plotësim të vendimit lidhur me themelimin e Këshillit për Siguri në Bashkësi;
13. Shqyrtimi dhe aprovimi i Propozim-vendimit për caktimin e lokacionit për ndërtimin e objektit të Kryqit të Kuq;
14. Shqyrtimi dhe aprovimi i Propozim-vendimit për formimin e komisionit për ndryshim-plotësimin e rregullores për punën e kuvendit dhe organeve të tij;
15. Pyetje dhe përgjigje nga anëtarët e kuvendit;
16. Të ndryshme.

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 31 janar 2023;

Fortuna Krasniqi, drejtoreshë e DUMM-së-kërkoj që në procesverbal të pasqyrohet i gjithë diskutimi i saj.

Pas shqyrtimit të kësaj pike të rendit të ditës, Kuvendi me vota “unanime”, aprovoi procesverbalin nga mbledhja rregullt e Kuvendit të Komunës së Vushtrrisë, mbajtur më datë 31 janar 2023, me vërejtjen e paraqitur më lartë.

2. Shqyrtimi i Informatës për gjendjen e sigurisë në Komunën e Vushtrrisë për vitin 2022;

Reshat Kovaçi, Komandat i Stacionit Policor në Vushtrri-paraqiti sqarime lidhur me informatën në fjalë duke prezantuar statistika për veprat penale dhe gjendjen e sigurisë në Komunën e Vushtrrisë.

Faton Hyseni, anëtar i kuvendit –tha se komuna jonë ka gjithsej 12.796 nxënës të sistemuar në 38 institucione para universitare, andaj në kuadër të angazhimeve rreth shkollave policia ka zbatuar një plan kontrolli në shkolla në muajin maj, që ka pasur për qëllim eliminimin e gjitha formave të dukurive negative tek nxënësit sidomos përdorimit të narkotikëve dhe armëve. Pyeta e tij është a kishe me qenë më mirë që plani i kontrollit të shtrihet gjatë gjithë vitit, shembull çdo muaj të kontrollohen nga 3 apo 4 shkolla kjo do të kishte ndikim pozitiv në sigurinë e nxënësve.

Reshat Kovaçi, Komandat i Stacionit Policor në Vushtrri-sqaroi se kontrolli nëpër shkolla bëhet me kërkesën e DKA-së dhe pas marrjes së një urdhërese prej gjykatës, përsëritja e shpeshtë e këtyre kontrolleve për pos që është e panevojshme mund të jetë edhe kundër drejtave të njeriut (fëmijëve).

Ymer Haradinaj, anëtar i kuvendit –duke ju referuar informatës në fjalë ku ceket se gjendje e sigurisë në komunën tonë ka qenë e qetë dhe stabile më tej thuhet se kemi pasur rritje të rasteve të veprave penale nga 1126 raste në vitin 2021 në 1168 raste në vitin 2023. Më pas thuhet se te veprat penale ka pas një rritje nga 754 në 853 vepra penale në përqindje prej 8%. Në këtë rast kërkoj të sqarohet se cila informatë është e saktë. Mandej tek rastet e veprave penale dhunë në familje kemi rritje duke krahasuar me vitin e kaluar ku kemi pas 59 Raste në 2021 e në vitin 2022 kemi 108 raste apo thënë në përqindje një rritje prej 83.1% dhe kjo është shqetësuese. Po ashtu Kanosjet janë veprat që kane shënuar rritje konsiderueshme në këtë vit kanë ndodhur 90 nga 56 që kanë ndodhur në vitin e kaluar. Në informatë është cekuar se siguria në shkolla ka qenë në nivel të mirë të sigurisë edhe në vitin 2022 , kemi punuar në bazë të planit Operativ Siguria në shkolla ku zyrtarët e angazhuar rreth shkollave kanë bërë një punë të mirë në ofrimin e një ambienti sa me te sigurt për nxënësit dhe personelin e shkollave. Puna e zyrtarëve të angazhuar ka pas në fokus parandalimin e incidenteve në shkolla dhe rreth tyre. Në kuadër të angazhimeve rreth shkollave kemi zbatuar edhe një plan kontrolli në shkolla në muajin maj qe ka pas për qëllim eliminimin e çdo dukurie negative tek nxënësit sidomos. , përdorimit të narkotikëve dhe bartjeve të armëve .Gjatë vitit kemi zhvilluar ligjëрата vetëdijesimi në shumë shkolla për ndërgjegjësimin e tyre rreth dukurive negative në shoqëri . Besoj se bashkëpunimi i mirë me drejtorët dhe mësimdhënësit do vazhdojë dhe gjendja e sigurisë do jetë gjithnjë më e mirë. Në informatë nuk janë paraqitur rastet e dhunës nëpër shkolla dhe cilët do të jenë mekanizmat që do ta luftojnë përdorimin e narkotikëve nga nxënësit. Një tjetër brengë tek prindërit e fëmijëve është se në disa lokale nga nxënësit luhen lojëra të rrezikshme kompjuterike fëmijë të moshës 10-15 vjet, ku në këto lojëra vriten personalitete të ndryshme, dhe kjo po ndikon që fëmijët të bëhen arrogant, agresiv dhe të pa interesuar për mësim dhe krijojnë sjellje të pahijshme ndaj prindërve dhe bashkëmoshatarëve të tyre. Në fund tha se është mirë të kemi një mekanizëm koordinues me policës, shkollës, dhe prindërve për luftimin e kësaj dukurie.

3. Shqyrtimi dhe aprovimi i Draft – Rregullores për Përcaktimin e Kritereve të Ndarjes së Mjeteve Financiare nga Fondi për Transfere dhe Subvencione Personave Juridikë – OJQ dhe Personave Fizikë dhe Bashkëfinancim;

Leonora Gërguri, anëtare e kuvendit-propozoi që në kuadër të kësaj rregullore të futet një nenë i posaçëm që i lihen kompetencat kuvendit që të ndaj mjetet mbi 2000 €, kjo do të mund të inkorporohej tek neni 5 subvencionimi pa thirrje publike.

Sylejman Mehulli, anëtar i kuvendit-tha se e përgëzon hartimin e kësaj rregulloreje e sidomos është për vlerësim që është marr për bazë propozimi i tij për rritjen e vlerës së qirasë për përfituesi e kësaj ndihme. Tek neni 19 propozoi përbërja e komisionit për ndarjen e subvencioneve kërkoj që të jetë edhe një zyrtar nga Drejtoria e Shëndetësisë, pasi që kjo ne fundit si organizatë buxhetore posedon një vlerë të konsiderueshme të subvencioneve. Ky anëtar mund të merret nga pika 2.3 d.th. m të hiqet nga Drejtoria e Financave ku janë paraparë 2 anëtar nga kjo e fundit.

Fatmire Cecelia, anëtare e kuvendit-propozoi që tek neni 6 të shtohet një paragraf i ri me tekstin si në vijim: certifikatën që dëshmon përmbushjen e obligimeve financiare ndaj ATK-së, kur bëhet fjalë për përfitim të subvencionit nga personi juridik. Tek neni 7 të shtohet nënparagrafi 3.7. shmangia e subvencionimit të aktiviteteve të subjekteve politike.

Adnan Lahu, anëtar i kuvendit –tha se në gjitha këto propozim-rregullore shihet vetëm nënshkrimi i kryetarit të komunës, andaj pyeti se komisionet që janë formuar a e kanë kryer punën e tyre.

Nexhmedin Rashica, Drejtor i DSHPS-së-tha se e mbështet propozimin një anëtarët e komisionit për ndarjen e subvencioneve të jetët nga Drejtori e Shëndetësisë.

Adnan Lahu, anëtar i kuvendit –tha se rastet e ndarjes së mjeteve nga kuvendi në vlerë mbi 2000 € janë bërë pa thirrje publike edhe në të kaluarën duke u shmangur rregullorja, andaj kërkoj që kjo dispozitë të futet në rregullore që kuvendi ta ketë këtë të drejtë për kërkesat që arsyetohen para kuvendit.

Ilmi Azemi, anëtar i kuvendit –tha se asnjëherë nuk ka ndodhur që në kuvend të trajtohen çështjet me kaq pasiguri, dhe shtoj se propozuesit e akteve fillimisht para procedimit të materialit duhet të sigurohen se kanë plotësuar konditat ligjore. Drejtoret e drejtorive duhet të arsyetojnë para kuvendit se pse një pikë duhet të aprovohet apo jo dhe jo të shkohet në diskutime të pa fundme dhe të cilat nuk kanë ndonjë produktivitet. Më tej shtoj se zyra ligjore nuk ka kompetencë të jap opinione para kuvendit dhe drejtoret e drejtorive nuk mund t'i bazojnë pritjet e tyre vetëm tek zyra ligjore se a do të aprovohet një pikë e rendit të ditës apo jo.

Ismet Gashi, udhëheqës i zyrës ligjore-tha se është e vërtet se në asnjë ligj nuk shkruan se zyra ligjore ka obligim të jetë e pranishme në seancat e kuvendit, ndërsa lidhur me çështjen e propozimit për lirim nga taksa për lejet ndërtimore dhe ndërrimin e destinimit të tokës bujqësore në tokë ndërtimore ceku se ajo çështje është e rregulluar dhe për të njëjtën kuvendi nuk ka të drejt ti heq ato taksa.

Në fund të debatit lidhur me këtë pikë të rendit të ditës kuvendit pas votimit me vota “unanime” Rregulloren për Përcaktimin e Kriteve të Ndarjes së Mjeteve Financiare nga Fondi për Transfere dhe Subvencione Personave Juridikë – OJQ dhe Personave Fizikë dhe Bashkëfinancim;

4. Shqyrtimi dhe aprovimi i Draft – Rregullores për Ndarjen e Bursave për Nxënës/Studentë dhe Shpërblimeve për Nxënës/Studentë të Komunës së Vushtrrisë;

Galip Audiu, anëtar i kuvendit –tha se të gjitha propozimet që i ka dhënë në mbledhjet e kaluara lidhur me këtë rregullore janë përfshirë dhe kjo është shumë mirë. Pastaj shtoi se e përgëzon ekzekutivin komunal për këtë rregullore e cila do të jetë një mekanizëm i përshtatshëm për ngritjen

e numrit të bursave dhe do të ketë ipakt pozitiv në ngritjen e ofrimit të përkrahjes për nxënësit dhe studentes e komunës sonë.

Refik Maloku, anëtar i kuvendit –paraqiti vërejtjet e tij tek neni 4 i kësaj draft-rregulloreje ku thuhet se: Drejtoria përkatëse i propozon Kryetarit të komunës numrin e bursave për nxënës/studentë, shumën e parave për një bursë, profilet arsimore dhe fushat e studimit për të cilat ndahen bursat, sipas planifikimit buxhetor. Në këtë rast këta parametra nuk janë përcaktuar. Tek pika 5 kërkohet tek këtë një riformulohet më eksplicit të dispozitës. Tek neni 6 propozoi që të ketë ndarje të kriterëve të përfituesve të bursës në dy kategori. Atyre meritore dhe studentët që kanë nevojë për ndihmë. Tek neni 8 nuk ceket kohëzgjatja e mandati të komisionit për ndarjen e bursave. Tek neni 10 Kryetari i komunës nxjerr vendim për emërimin e komisionit ad-hoc treanëtarësh me mandat njëvjeçar (për vitin shkollor/akademik) për shqyrtimin e ankesave.

Faton Hyseni, anëtar i kuvendit –tha se me këtë rregullore duhet tu jepet përparësi përfituesve të bursave për drejtimet deficitare si: Matematikë, Fizik, Kimi Informatikë e të ngjashme.

Ilmi Azemi, anëtar i kuvendit –tha se kriteret e përgjithshme në rregullore janë të parashtruar drejtë, ndërsa për drejtimet deficitare mund të parashihet një nenë i veçantë ku do të parashihej që 30% e bursave të dedikohet për drejtimet deficitare si: Matematikë, Fizik, Kimi Informatikë e të ngjashme.

Adnan Lahu, anëtar i kuvendit –tha se vërejt teknike dhe në riformulim të tekstit duhet të inkorporohen në këtë rregullore. Tutje shtoj se nëse tentohet të bëhet ndarja e kriterëve në dy kategori atëherë kjo është gabim pasi që bursa merret për angazhim dhe rezultatet e treguara në studime e jo si çështje ndihme humanitare. Ndërsa lidhur me drejtimet deficitare propozoi të futet një nenë që përcakton se në kushtet e konkursit do të sigurohet përqindja e caktuara për këto drejtime që vlerësohet se janë deficitare

Gresa Muli, anëtare e kuvendit-tha se është tepër me rëndës të kemi një rregullore të qartë dhe cila normon gati çdo çështje sepse kjo krijon objektivitet dhe drejtshmëri në ndarjen e bursave. Mandej ceku se kjo rregullore është punuar mirë ku ceku se kriteret janë përcaktuar në formë të saktë. Tek neni 7 propozoi të shtohet paragrafi 2.7. fëmijë pa njërin, apo të dy prindërit, që në kushte të barabarta do të jepej përparësi.

Sylejman Mehollli, anëtar i kuvendit-vlerësoi se kishte me qenë mirë që me rregullore të përcaktohet që studentët përfitues të bursës universitare a kanë të drejtë të përfitojnë burës komunale, dhe për këtë mendon se një përjashtim i tillë nuk do të ishte i drejtë. Po ashtu vlerësoi se mirë kishte me qenë të futet edhe një nenë për ofrimin e burës për nxënës apo studentë me aftësi të jashtëzakonshme apo supertalente.

Hava Rruka- Mlinaku, drejtoreshë e DA-së-njoftoj se kjo rregullore është hartuar nga kryetari i komunës i cili është njohës i mirë i arsimit, ajo sqaroi se shuma e vlerës së bursës do të përcaktohet konfoma buxhetit. Ndërsa lidhur me drejtimet deficitare mendon se ato mund tu jepet prioritet me konkurs.

Dardan Abazi, drejtor i DKA-së-tha se porritet i Drejtorisë së Arsimit janë drejtimet deficitare dhe se synimi i tyre është që 100% e bursave të jetë e orientuar në këto drejtime, ai ceku se nuk do të ishte mirë të kufizohemi me përqindje por le të aprovohet rregullorja ashtu siç është. Më tej tek neni 6 i rregullores është vendosur kriteri kompetitiv pasi që vetë bursa ka karakter për të arriturat në studime.

Në fund të debatit lidhur me këtë pikë të rendit të ditës kuvendit pas votimit me 14 vota “për” 15 “kundër” nuk e aprovoj propozimin e proceduar me shkrim nga kryetari i komunës

të Draft – Rregullores për Ndarjen e Bursave për Nxënës/Studentë dhe Shpërblimeve për Nxënës/Studentë të Komunës së Vushtrrisë.

Hava Rruka- Mlinaku, drejtoreshë e DA-së-në emër të kryetarit të komunën kërkoj që kjo që draft-rregullorja për bursat të tërhiqet nga rendi i ditës.

Ilmi Azemi, anëtar i kuvendit –tha se nuk është qëllimi që të pengohet procesi i aprovimit të kësaj rregulloreje, por vetëm u dhanë disa propozime për kompletimin e këtij akti. Propozimin që e dha më herët për 30 % të bursave për drejtimet deficitare, por edhe nëse nuk ceket kjo përqindje nuk do të ketë ndonjë problem, pasi që ky obligim rezervohet për drejtorinë dhe komisionin.

Dardan Abazi, drejtor i DKA-së-në rekapitullimin e debatit lidhur me këtë pikë të rendit të ditës shtoj se çështja e studentëve me aftësi të lartë mund të subvencionohet me vendime të veçanta por jo të futet në këtë rregullore. Mandej tek neni 4 të shtohet pika 5 Drejtoria e Arsimit ju jep përparësi drejtimeve deficitare, në profilet arsimore që përfitojnë bursë. Pastaj pika 6 më radhë riformulohet sipas një versioni të drejt sintaksor. Tek neni 7 shtohet pika 2.7 fëmijë pa njërin, apo të dy prindërit. Tek neni 8 duhet të shtohet mandati i komisionit dhe atë në tekstin si në vijim: Kryetari i komunës nxjerr vendim për emërimin e komisionit treanëtarësh (3) me mandat njëvjeçar (për vitin shkollor/akademik) për ndarje të bursave.

Refik Maloku, anëtar i kuvendit –tha se më herët doli në votimi propozimi i kryetarit të komunës dhe ai nuk i mori votat e mjaftueshme, për shkak se nuk u pranuan propozimet nga anëtarët e kuvendit. Andaj kësajvoj kjo çështje është përfunduar dhe si e tillë nuk mund të të votohet sërish në këtë mbledhje.

Adnan Lahu, anëtar i kuvendit –tha se propozimi i kryetarit të komunës nuk kaloj, por tani duhet të qitet në votim propozimi i anëtarëve të kuvendit për ta përfunduar procesin e votimit lidhur me këtë pikë të rendit të ditës.

Pas konsultave dhe sqarimeve të nevojshme kryesuesja e kuvendit e hodhi në votim draft rregulloren e bursave me plotësimet e propozuara nga anëtarët e kuvendit, pas votimit kuvendi me 19 vota “për” aprovoj Draft – Rregulloren për Ndarjen e Bursave për Nxënës/Studentë dhe Shpërblimeve për Nxënës/Studentë të Komunës së Vushtrrisë, me propozimet e anëtarëve të kuvendit.

5. Shqyrtimi dhe aprovimi i Draft – Rregullores për Fillimin dhe Mbarimin e Orarit të Punës së Veprimtarive Afariste – Bizneseve në Komunën e Vushtrrisë;

Alban Bajrami, anëtar i kuvendit –kërkoj të përcaktohet saktë se cila ditë do të jetë pushime për sallonet e ondulimit, dita martë apo dita e diele. Mendon dhe konsideron se dita e diele do të jetë më në rregull të jetë ditë pushimi jashtë sezonit për këto kategori.

Sylejman Mehulli, anëtar i kuvendit- përsërit propozimin e tij se zgjidhja e kësaj çështje do të mund të gjendet më së mirë përmes Asociacionit të Komunave të Kosovës, me një rregullore unike. Tutje shtoi se tek neni 12 orari i punës për barnatore, ordinanca dhe klinika private, ku thuhet se: Ordinancat dhe klinikat private punojnë për të dy sezonat prej orës 07:00 - 22:00, mirëpo në bazë të ligjit për shëndetësinë thuhet se ordinancat duhet të punojnë me orar 7/24 në tërë vitin, për shkak të urgjencave shëndetësore. Nëse këto institucione kanë kërkuar të kenë një ditë pushim atëherë edhe këto është dashur të futen në një orar të kujdestarive sikurse tek rasti i barnatoreve. Po ashtu edhe neni 14 i kësaj rregulloreje duhet të rishikohet për sa i përket orarit të punës për barnaret bujqësore për ditët e diela sepse Vushtrria është vend bujqësor dhe gjatë vikendeve qytetarët

kryesisht punojnë në të mbjellat bujqësore e që kanë nevoja për furnizim nga këto barnatore. Andaj në këtë rast duhet të aplikohet orari me kujdestari apo të hiqen nga kjo kategori këto subjekte. Tek neni 10.3 tregu i kafshëve punon vetëm ditën e premte, prej orës 07:00 - 15:00, të shtohet fjalia përjashtimisht javës së Kurban Bajramit Në fund ngriti dilema dhe kërkoj të rishikohet neni 22 sa i përket pezullimit të kësaj rregulloreje nga ana e kryetarit të komunës, sepse kjo e drejt nuk i takon kryetari por është në kompetencën e kuvendit.

Agron Përçuku, anëtar i kuvendit-paraqiti vërejtjet e tij për sa i përket neni 22 pezullimi i përkohshëm i dispozitave të kësaj rregulloreje, ku thuhet se: në rrethana të caktuara sipas vlerësimit të Kryetarit të komunës dhe rekomandimit nga faktorë tjerë institucionalë dhe qytetar, Kryetari i komunës mund të pezullojë përkohësisht zbatimin e dispozitave të caktuara të kësaj rregulloreje dhe të përcaktojë me vendim orarin e përkohshëm brenda vitit kalendarik për veprimtari të caktuara biznesore. Duke u bazuar në dispozitat e LVL-së konstaton se neni 22 i kësaj rregulloreje është në kundërshtim të plotë me nenin 40 të Ligjit për Vetëqeverisje Lokale ku thuhet: s 40.2 Kuvendi i komunës nuk i delegon përgjegjësitë e tij lidhur me marrjen e vendimeve për: a) statutin dhe Rregulloren e punës, rregulloret komunale dhe miratimin, ndryshimin dhe shfuqizimin e tyre. Në këtë rast propozoi dhe kërkoj që të hiqet neni 22 nga kjo rregullore.

Ilmi Azemi, anëtar i kuvendit –tha se përkundër shumë dilemave dhe vështirësive që do të dalin është mirë që kjo rregullore të aprovohet sot. Çështja e neni për pezullimin e këtij akti nga kryetari i komunës, vlerëson se duhet të mbetet kjo për arsye praktike pasi që kuvendi nuk mund të mbledhjet në kohët të shpejt dhe delegimi i një autorizim për kryetarin e komunës i shërben funksionimit më të mirë administratës së komunës. Tek neni 7.5 taksa prej 30 € për orar të zgjatur të disa lokaleve afariste, duhet të shikohet sepse taksat vendosen konform ofrimit apo marrjes së një shërbimi të caktuar. Tek neni 14 propozoi të shtohet se barnoret bujqësore do të punojnë sipas një orari kujdestari për ditëve të diela sipas orarit të përcaktuar nga Drejtoria e Bujqësisë.

Bekim Zabërgja, anëtar i kuvendit –paraqiti vërejtjet tek neni 11 orari i punës për pikat e shitjes së karburanteve, pikat e shitjes së karburanteve punojnë për të dy sezonat 24 orë non-stop. Ndërsa propozoi që metrazha për Restorantet dhe marketet e vogla si dhe veprimtaritë tjera afariste të cilat janë të ngjitura me pika të shitjes së karburanteve të jetë deri 100 m², e të cilat kanë të drejtë të dhe mund të punojnë për të dy sezonat 24 orë non – stop.

Adnan Lahu, anëtar i kuvendit –tha se grupi kuvendar i LDK-së e përkrah këtë rregullore me ndryshimet e propozuara nga anëtarët e kuvend duke e hequr neni 22 të saj.

Bujar Pllana, drejtor i Drejtorisë së Inspektiveve-tha se lidhur me çështjen e pushimit për sallonet e ondulimit do mbetet në dispozicionin e këtyre të vendosin a dëshirojnë të martën apo të dielën ta bëjnë ditë pushimi. Mandej tek ordinancat private që ofrojnë shërbime shëndetësore propozoi që të punojnë edhe të dielave, gjithashtu njëjtë të veprohet edhe me barnoret bujqësore.

Ismet Gashi, udhëheqës i zyrës ligjore-deklaroi se pavarësisht së është inkorporuar neni 22 i kësaj rregullore i cili fletë për suspendimin e fuqisë së saj nga kryetari i komunës, prapëseprapë është e drejtë ekskluzive e kuvendit ta votoj këtë rregullore me këtë dispozitë. Lidhur me atë se kjo depozitë a është në harmoni me ligjin nuk e ka një mendim të qartë në këtë moment.

Melihate Basholli-Latifi, Kryesuese e Kuvendit-propozoi që tek neni 5 Orari i punës i qendrave tregtare, marketeve, dyqaneve tregtare ushqimore, pijeve, duhanit, si dhe tregtia e çdo veprimtarie tjetër të artikujve joushqimor të shtohet pika 5.4. në tekstin si në vijim: Ditën e vikendit (e diel) dhe festave zyrtare, bizneset nga neni 5 nuk punojnë, përveç dyqaneve tregtare ushqimore në fshatra, të cilat do të punojnë deri në orën 12:00.

Bujar Pllana, drejtor i Drejtorisë së Inspektiveve-kërkoj nga kuvendi që barnoret bujqësore dhe ordinancat veterinarë të punojnë edhe ditëve të diela pa aplikuar rotacion.

Në fund të debatit lidhur me këtë pikë të rendit të ditës kuvendit pas votimit me 11 vota “për” 10 “kundër” 1 votë “abstenim” aprovoj Rregulloren për Fillimin dhe Mbarimin e Orarit të Punës së Veprimtarive Afariste – Bizneseve në Komunën e Vushtrrisë, me propozimet e anëtarëve të kuvendi të rikapituluara nga drejtori i Drejtorisë së Inspektimeve.

Në vazhdim kuvendi me vota “unanime” vendosi që bëjë një zhvendosje të shqyrtimit të pikës së 13 të rendit të ditës dhe atë:

13. Shqyrtimi dhe aprovimi i Propozim-vendimit për caktimin e lokacionit për ndërtimin e objektit të Kryqit të Kuq;

Feride Hyseni, kryetare e Kryqit të Kuq të Kosovës- në adresimin e saj paraqiti para kuvendit një ekspozitë të shkurtër për punën dhe veprimtarinë e Kryqit të Kuq dhe kërkoj mbështetje nga kuvend për votimin e kësaj pike të rendit të ditës në ç’ rast i falënderoj të gjithë anëtarët e kuvendit për mbështetjen.

Ilmi Azemi, anëtar i kuvendit –tha se përgjigje e kuvendit në kërkesën e Kryqit të Kuq do të jetë pozitive për në ndarjen e asaj prone për Kryqin e Kuq, duke mundësuar kështu krijimin e kushteve më të mira për punën e kësaj organizate në ofrimin e shërbimeve për qytetarët e Komunës së Vushtrrisë. Kërkoj nga të gjithë anëtarët e kuvendi që unanimisht ta përkrahin këtë pikë të rendit të ditës.

Adnan Lahu, anëtar i kuvendit –deklaroi se grupi kuvendar i LDK-së e mbështet këtë propozim-vendim dhe vlerëson se ndërtimi i këtij objektit do të ndikoj në ngritjen e ofrimit të shërbimeve për qytetarët e Komunës së Vushtrrisë.

Alban Bajrami, anëtar i kuvendit –tha se e mbështet këtë pikë të rendit të ditës dhe shtoj se ndërtimi i këtyre zyrave për Kryqin e Kuq do të ndikoj në ngritjen e cilësi së shërbimeve për qytetarët e Komunës së Vushtrrisë.

Sylejman Mehulli, anëtar i kuvendit- deklaroi se grupi kuvendar i LVV-së e mbështet kërkesën e kryqit të kuq për ndarjen e kësaj parcele për ndërtimin e zyrës së ardhshme për këtë organizatë. Po ashtu ai falënderoj kryqin e kuq për gjithë kontributin e dhënë në të gjitha etapat e historikut të Kosovës.

Bekim Zabërgja, anëtar i kuvendit –tha se Drejtoria për Gjeodezi e ka bërë parcializimin e kësaj prone në sipërfaqe prej 5 ari, dhe në këtë rast është kompletuar dokumentacioni ashtu që janë plotësuar të gjitha konditat ligjore për aprovimin e këtij vendimi.

Në fund të debatit lidhur me këtë pikë të rendit të ditës kuvendit pas votimit me vota “unanime” vendosi me sa vijon:

1. Me këtë vendim caktohet lokacioni për ndërtimin e objektit të Kryqit të Kuq - Dega në Vushtrri, në pjesë të parcelës kadastrale P-70202016-02253-11, në sipërfaqe prej 500 m², nga sipërfaqja e përgjithshme prej 4300 m², Zona Kadastrale Vushtrri, pronë e Komunës së Vushtrrisë.
2. Për zbatimin e këtij vendimi obligohet Drejtoria për Shëndetësi dhe Mirëqenie Sociale, Drejtoria për Gjeodezi, Kadastër dhe Pronë dhe Drejtoria për Urbanizëm dhe Mbrojtjen e Mjedisit.
3. Pjesë përbërëse e këtij vendimi janë certifikata mbi të drejtën e pronës dhe kopja e planit

6. Shqyrtimi i Raportit periodik për zbatimin e rekomandimeve të dhëna në raportin e Auditimit nga Zyra Kombëtare e Auditimit;

Pas shqyrtimit të kësaj pike të rendit të ditës kuvendi pas votimit me vota “unanime” aprovoj Raportin periodik për zbatimin e rekomandimeve të dhëna në raportin e Auditimit nga Zyra Kombëtare e Auditimit.

7. Shqyrtimi i Informatës për shërbimet shëndetësore për vitin 2022 në Komunën e Vushtrrisë;

Sylejman Mehulli, anëtar i kuvendit-Të dashur qytetarë të Komunës së Vushtrrisë, para nesh kemi informatën e Drejtorisë së Shëndetësisë lidhur me shërbimet shëndetësore për vitin 2022. Para se të prezantoj para jush raportin analitik dhe krahasues me vitet paraprake për shërbimet shëndetësore më lejoni të ritheksoj parimin e parë historik të mjekësisë që kur ajo ekzistonte e që kurrë nuk bëhet i vjetër e që është parimi **“Primum non nocere” që në gjuhën tonë të bukur shqipe përkthehet si “Së pari mos dëmto”**.

Të dashur qytetarë të Komunës së Vushtrrisë po e nisi analizën time për këtë lami kaq me peshë pikërisht me këtë postulatë sepse është pikërisht e kundërta e këtij parimi ajo qfarë ka bërë Qeverisja e Ferit Idrizit me shëndetësinë e Vushtrrisë në vitin e parë të mandatit të saj. Pra ajo ka dëmtuar rëndë shërbimet shëndetësore me performancën e vet në vitin e parë të qeverisjes.

E vërteta e shëndetësisë dhe shërbimeve shëndetësore të një vendi janë të matshme. Ato matën me indikatorë apo tregues shëndetësor, prandaj për t'i ikur çfarëdo tendence që analizës time të provohet ti jepet kahje politike unë do të paraqes para jush në formë krahasuese disa nga indikatorët më të rëndësishëm që flasin të vërtetën e dëmtimit të shërbimeve shëndetësore të komunës sonë gjatë vitit 2022. Le ti marrim një nga një këta indikator:

I. Indikator i parë: Numri i institucioneve shëndetësore funksionale:

Nga 20 institucione shëndetësore funksionale sa i ka pasur komuna e Vushtrrisë tash e disa vite, në vitin 2022 nën Qeverisjen Idrizi ky numër ka rënë në 18. Pra në heshtje dhe pa transparencë janë mbyllur Ambulancat e Mjekësisë Familjare në fshatrat Zhilivodë dhe Skromë të cilat në këtë vit raportues as që figurojnë në tabelën e shërbimeve. Pra, në vitin 2022 kemi 2 institucione më pak që kanë ofruar shërbime shëndetësore.

II. Indikator i dytë: Numri i pacientëve dhe shërbimeve në sektorin e diagnostikës:

Thuajse nuk ka indikator tjetër që është dëmtuar në cilësi, shërbime dhe parametra në vitin e parë të qeverisjes Idrizi aq sa sektori i diagnostikës. Në Laborator përveç rënjes së numrit të analizave që punohen në raport me vitet paraprake ka rënë ndjeshëm edhe numri i pacientëve dhe shërbimeve. Le ti krahasojmë më shifrat zyrtare të dy viteve të fundit:

Nga 20 482 pacientë sa morën shërbime në vitin 2021, në vitin 2022 ky numër ka rënë në 15 333 apo hiq më pak se 5149 pacientë, kurse numri i shërbimeve në laborator nga 228 338 sa ishte në vitin 2021, në vitin 2022 ra në 150 531 apo hiq më pak se 77 807 shërbime më pak!! Për me keq ka 8 muaj që laboratori kundërligjshëm punon pa shef të diagnostikës dhe specialist të biokimisë dhe mbi 2 muaj edhe pa kryetëknik të shërbimit laboratorik.

Aspak më mirë nuk ishte edhe në shërbimin tjetër diagnostik atë të rentgenit stomatologjik i cili thuajse gjithë vitin ishte jashtë funksionit. Le ti krahasojmë me shifra: nga 838 pacientë sa morën

shërbim në vitin 2021, ku numër ra në vetëm 31 pacientë në vitin 2022 apo shprehur në numra plotë 807 pacientë më pak!! Kurse shërbimet në këtë sektor ranë nga 1779 sa ishin në vitin 2021, në vetëm 45 sosh në vitin 2022, pra hiq më pak se 1734 shërbime më pak se viti paraprak. Kjo nuk do koment ma tepër.

III. Indikatori i tretë: Shkalla e vaksinimit me vaksinat obligative

Një nga indikatorët më krenar që e ka pas Vushtrri në shëndetësi pa dyshim ndër vite ka qenë shkalla e përfshirjes së fëmijëve në vaksinim por që as ky tregues nuk i shpëtoj dëmtimit, që në vitin e parë të qeverisjes Idrizi. Dikur ishim komuna e parë në nivel Republike tani jemi komuna e fundit në nivel regjioni për sa i takon përfshirjes së fëmijëve në vaksinim. Bazuar në raportin e monitorimit të imunizimit nga QRSHP Mitrovicë, komuna e Vushtrrisë me vetëm 87% të përfshirjes së fëmijëve në imunizim ka mbetur mbrapa komunës së Mitrovicës e cila ka arritur përfshirjen në 89.2% dhe komunës së Skenderajt që ka arritur shkallën e përfshirjes në 92.2%. Përkundër kësaj nuk kemi parë as një organizim senzibilizimi apo përpjekje nga Komuna e Vushtrrisë për ta përmisuar situatën. Si rezultat i kësaj vetëm gjatë vitit 2022 kemi hiq më pak se 284 fëmijë nga komuna jonë të cilët nuk janë vaksinuar me vaksinat obligative duke rrezikuar seriozisht të kemi shpërthim të ndonjë epidemie të sëmundjeve vaksinë preventabile.

IV. Indikatori i katërt: Funkcionaliteti i pajisjeve dhe mjeteve motorike

Funksionaliteti i pajisjeve mjekësore sikurse edhe mjeteve motorike është parakusht për shërbime cilësore. Por, viti 2022 ishte vit në të cilin në shumicën e kohës ambulancat dhe shumë pajisje mjekësore ishin jashtë funksionit duke dëmtuar rëndë cilësinë e shërbimeve shëndetësore. Mjafton të specifikojmë faktin se ka disa muaj që pacientët në dializë barten në shërbimin e dializës me kamioneten me rimorkio duke harruar ndjenjën e përgjegjesisë nëse ky transport i papërshtatshëm përkeqëson shëndetin e ndonjërit nga pacientët apo mundëson përhapjen e ndonjë infeksioni si hepatiti B që është mjaftë prevalentë tek këto raste të sëmundjes.

V. Indikatori i pestë: Realizimi i buxhetit vjetor të planifikuar

E kam paraqitur edhe në seancën e kaluar e kanë konfirmuar edhe përfaqësuesit e subjektit politik në pushtet se shkalla totale e realizimit buxhetor të planifikuar në Drejtorinë e Shëndetësisë së Komunës së Vushtrrisë për vitin 2022 ishte i tmerrshëm. Pacientët, shëndetësia dhe qytetarët e Vushtrrisë në përgjithësi, humben duke mos realizuar nga buxheti i planifikuar hiq më pak se: 794 007.56 Euro të cilat shkuan në suficit.

Të dashur qytetarë unë do ta përmbyll me kaq analizën dhe fjalimin tim duke mos dashur të shtoj as edhe një koment politik përtej shifrave të vërteta indikative dhe zyrtare të paraqitura nga raportet zyrtare të dy viteve të fundit. Ndoshta për shumë kënd është e dhimbshme t'i dëgjoj këto të dhëna por që misioni i një kuvendarit është e vërteta e sidomos kur ajo paraqitet me fakte.

Nexhmedin Rashica, drejtor i DSHP-së-tha ajo se çfarë deklaroi parafolësi i tij është e pa vërtetë dhe po përdoret për marketing politikë. Më tej sqaroi se Skrom dhe Zhilivoda, janë fshatra gati të zbrazura tërësisht dhe kjo bërë që mos të ketë ndonjë leverdi ekonomike për t'i dërguar mjek atje. Lidhur me laboratorin njoftoi se në fillim ka pasur problem, ndërsa tani gjithçka është në rregull dhe realizohen afër 18 lloje të analizave. Lidhur me shpenzimin e buxhetit njoftoi se po keq informohet publiku sepse buxheti është realizuar në manën prej 73% në Drejtorinë e Shëndetësisë.

8. Shqyrtimi dhe aprovimi i Raportit vjetor të Komitetit për Komunitete për vitin 2022;

Pas shqyrtimi të kësaj pike të rendit të ditës, kuvendi pas votimit me vota “unanime” aprovoj Raportin vjetor të Komitetit për Komunitete për vitin 2022.

9. Shqyrtimi i Informatës për punën e Këshillit Komunal për Siguri në Bashkësi për vitin 2022;

10. Shqyrtimi i Propozim – vendimit për emërim të komisionit për përzgjedhjen e drejtorëve dhe zëvendësdrejtorëve në Komunën e Vushtrrisë;

Ilmi Azemi, anëtar i kuvendit –tha se ky komision ka kryer një punë të jashtëzakonshme profesionale, andaj kërkoj nga anëtarët e kuvendit të votojnë këtë propozim-vendim në mënyrë unanime.

Refik Maloku, anëtar i kuvendit –tha se edhe më herët e kishte kundërshtuar përbërjen e këtij komisioni dhe e kundërshton edhe tani. Kjo për faktin se ky komision ka qenë dhe është jo profesional dhe politikisht i anshëm, andaj kjo ka bërë të anulohem shumë konkurse për shkeljet që i kanë bërë.

Adnan Lahu, anëtar i kuvendit –tha se para disa dite kryetari i komunës ka bërë akuza të rënda në drejtim të këtij komisioni, dhe tani në mënyrë paradoksale sillet i njëjti komision për votim në kuvend, nëse ky komision ka bërë shkelje atëherë si ka logjik që prapë i njëjti të votohet.

Faton Hyseni, anëtar i kuvendit –tha se komision në vitin e kaluar, ka punuar në mënyrë profesionale dhe e edhe kjo përbërje e komisionit është profesionale, andaj kërkoj që ky propozim-vendim të aprovohet.

Ymer Haradinaj, anëtar i kuvendit –tha se neni 3 i këtij vendim bie ndesh me udhëzimin administrativ sepse thuhet që mandati i këtij komisioni është për një vit shkollor ndërsa tani jemi në gjysmën e vitit shkollor kjo duhet të ndryshohet sepse udhëzimi përcakton se komisioni formohet vetëm për një procedurë të rekrutimit apo konkurs. Tutje shtoi se procesi i zgjedhjes së drejtorëve dhe zëvendësdrejtorëve të shkollave në Komunën e Vushtrrisë, duhet të bëhet sipas legjislacionit në fuqi Ligjit për arsimin Parauniversitarë dhe Udhëzimin Administrativ Nr.151/2020 për Detyrat, Përgjegjësitë, Procedurat dhe Kriteret e Zgjedhjes së Drejtorit dhe Zëvendësdrejtorit të Institucionit Publik Edukativo-Arsimor dhe Aftësues Parauniversitar, ku përcaktohen edhe parimet bazë siç janë: parimi i ligjshmërisë dhe depolitizimit, parimi i meritokracisë dhe kompetencës profesionale, parimi i transparencës dhe bashkëpunimit institucional, parimi i paanësisë mundësive të barabarta dhe mos diskriminimit dhe parimi i barazisë gjinore. Andaj në start po del se kemi shkelje të këtyre parimeve sidomos ai i barazisë gjinore. Tek pika 1.7 thuhet se: kandidati duhet të sjellë dëshmi dhe dokumente si në vijim: dhe aty në mënyrë taksative përshkruhen një mori e kushteve dhe dokumenteve që duhet ti posedoj kandidati pjesëmarrës në konkurs, ndërsa tek pika 1.7.7. thuhet se: kandidati duhet ta nënshkruaj deklaratën në betim që vërteton se në tri vitet e fundit kandidati/ja nuk ka qenë në asnjë funksion udhëheqës në strukturat e partive politike. Dy anëtarë të komunës të cilët propozohen nga DKA, dhe miratohen nga kuvendi i komunës .Anëtar i parë duhet të jetë i punësuar në DKA dhe duhet të jetë kryesuese i komisionit, anëtar i dytë po ashtu i propozuar nga DKA mund të jetë ekspert i pavarur i arsimit, drejtor i institucionit arsimor me performancë të lartë, përfaqësuese nga këshilli i prindërve me kualifikim të lartë dhe ekspertizë në fushën e edukimit po ashtu pjesëmarrës gjatë këtij procesi duhet të jenë dy përfaqësues nga Këshilli Drejtues në cilësinë e vëzhguesve një prind

dhe një mësimdhënës. Në fund shtoi se duke marr për bazë gjithë këto dilema nuk është e drejt që kjo pikë në këtë përbërje të votohet sot.

Në vazhdim kryesuesja e kuvendit duke marr për bazë mungesën e kuorumit në sallën e mbledhjes, i ndërpreu punimet e mbledhjes, dhe njoftoj se mbledhje do të vazhdoj ditën e nesërm nga ora 10:00, me pikat e mbetura të pushqyrtuar të rendit të ditës.

Ora e ndërprerjes së mbledhjes 17:25.

Më datën 24 shkurt 2023 ditë e premte ora 10:50 kryesuesja e kuvendit hapi punimet e mbledhjes së ndërprerë të datës 23 shkurt 2023, konstatoj se në sallë janë të pranishëm 18 anëtarë të kuvendit kuorum i mjaftueshëm për marrjen e vendimeve të plotfuqishme me pika e rendit të ditës në renditje numërore pikat 10,11,12,14,15 dhe 16 të mbetura nga mbledhja e ndërprerë.

Hava Rruka- Mlinaku, drejtoreshë e DA-së-tha se çështja e Propozim – vendimit për emërim të komisionit për përzgjedhjen e drejtorëve dhe zëvendësdrejtorëve në Komunën e Vushtrisë, është e rregulluar me udhëzim administrativë

Pas shqyrtimit të kësaj pike të rendit të ditës, kuvendi pas votimit me 18 vota “për” vendosi me sa vijon:

1. Me këtë vendim formohet Komisioni për përzgjedhje për vendet e punës, drejtor dhe zëvendësdrejtor, në shkollat fillore, të mesme të ulëta dhe të mesme të larta në Komunën e Vushtrisë, me këtë përbërje:

- 1.1.** Hashim Hajrizi, zyrtar ligjor dhe i personelit në DKA;
- 1.2.** Burim Gjaka, drejtor i SHFMU ”Mustafë Shyti” Oshlan;
- 1.3.** _____, përfaqësues i MASHT-it.

2. Komisioni do t’i zhvillojë të gjitha procedurat për përzgjedhjen e drejtorëve dhe zëvendësdrejtorëve në Komunën e Vushtrisë, konform Udhëzimit Administrativ nr.151/2020 për Detyrat, Përgjegjësitë, Procedurat dhe Kriteret e Zgjedhjes së Drejtorit dhe Zëvendësdrejtorit të Institucionit Publik Edukativo-Arsimor dhe Aftësues Parauniversitar.

3. Komisioni i cekur si në pikën 1 të këtij vendimi ka mandat për një vit shkollor.

4. Për zbatimin e këtij vendimi obligohen: Drejtoria Komunale e Arsimit dhe komisioni i lartcekur.

11. Shqyrtimi dhe aprovimi i Propozim – vendimit për lirim nga pagesa e taksës për shfrytëzimin e hapësirave publike si dhe kiosqeve nga druri për më pak se një vit;

Pas shqyrtimit të kësaj pike të rendit të ditës, kuvendi pas votimit me 18 vota “për” vendosi me sa vijon:

1. Me këtë vendim lirohen nga pagesa e taksës komunale, shfrytëzimi i hapësirave publike para lokaleve, të cilat ushtrojnë veprimtarinë e gastronomisë për më pak se një vit, si dhe kioskat nga druri që jepen në shfrytëzim më pak se një vit nga data 3.1.2023 deri më 22.12.2023.

2. Qëllimi i këtij vendimi është përkrahja e këtyre veprimtarive, të cilat operojnë në gjendje jo të mirë ekonomike, vlera e përgjithshme e këtyre masave përllongarit të jetë 10000.00€, për kioskat nga druri, ndërsa për shfrytëzimin e hapësirave publike para lokaleve, të cilat ushtrojnë veprimtarinë e gastronomisë, shuma përllongarit të jetë 4300.00€, për periudhën e cekur si në pikën e parë të këtij vendimi.

3. Për zbatimin e këtij vendimi obligohen: Drejtoria për Buxhet dhe Financa, Drejtoria për Urbanizëm dhe Mbrojtje të Mjedisit, si dhe Drejtoria për Inspektim.

12. Shqyrtimi dhe aprovimi i Propozim – vendimit për ndryshim dhe plotësim të vendimit lidhur me themelimin e Këshillit për Siguri në Bashkësi;

Pas shqyrtimit të kësaj pike të rendit të ditës, kuvendi pas votimit me 18 vota “për” vendosi me sa vijon:

1. Me këtë vendim ndryshohet vendimi 01-Nr. 24/22 i datës 31.1.2022 për themelimin e Këshillit Komunal për Siguri në Bashkësi, si në vijim:

1.1 Në pikën 1.14 Sedat Durmishi, përfaqësues i komunitetit ashkali, shkarkohet nga pozita e anëtarit të KKSB-së;

1.2 Në pikën 1.15 Brendon Shaqiri, përfaqësues i komunitetit rom, shkarkohet nga pozita e anëtarit të KKSB-së;

1.3 Në paragrafin 1, pika 1.3 Miradije Maloku, ish - Drejtore e Drejtorisë për Arsim, pushon të jetë anëtare e KKSB-së;


1.4 Në pikën 1.10 Simo Çimburoviç, përfaqësues i kishës ortodokse serbe, pushon të jetë anëtar i KKSB-së.

14. Shqyrtimi dhe aprovimi i Propozim-vendimit për formimin e komisionit për ndryshim-plotësimin e rregullores për punën e kuvendit dhe organeve të tij;

Pas shqyrtimit të kësaj pike të rendit të ditës, kuvendi pas votimit me 18 vota “për” vendosi që kjo pikë të shtyhet për mbledhje e radhës.

Mbledhja përfundoi në ora: 11:00.

Bastri Duraku


Procesmbajtës

Melihate Basholli-Latifi


Kryesuese e Kuvendit

